

每週經課朗誦經文(巴克禮台語漢字)2014/06/01

共同經課 - 1 使徒行傳一章六節~十四節

6 按呢in聚集的時，問伊講：「主啊，你佇此時欲將國復倒互以色列嗎？」7 伊就給in講：「父所下佇伊家己權內的時及期，毋是恁所通知。8 獨獨聖神臨到恁的時，恁欲得著才能，閣佇耶路撒冷、遍猶太，及撒瑪利亞，直到地極，欲做我的干證。」9 諸個話講了，in啲看的時，耶穌受舉起上天，有雲接伊，in就看袂見。10 伊去的時，in向天注目看，忽然有二人穿白衫，倚佇身邊，11 講：「加利利人啊，啥事倚啲看天？此個耶穌離別恁受接上天，恁看伊按呢上天，伊亦欲照按呢來。」12 彼時in對彼個名叫橄欖的山，倒去耶路撒冷，此個山近耶路撒冷，相離開有安息日的路。13 已經入，就上in所住的樓頂；有彼得、約翰、雅各、安得烈、腓力、及多馬、巴多羅買、及馬太、亞勒腓的子雅各，及西羅底的西門，及雅各的子猶大。14 諸個人及幾若個婦仁人以及耶穌的老母馬利亞，參伊的兄弟，攏同心專務祈禱。

共同經課 - 2 詩篇六十八篇一節~十節，三十二節~三十五節

1 [大衛的詩歌，交互樂官。] 願上帝起來，互伊的對敵四散，互怨恨伊的人對伊的面前逃走。2 你給in趕散，親像煙受吹散；歹人見著上帝的面就消滅，親像蠟見著火就溶去。3 總是義人欲歡喜，in佇上帝的面前欲快樂，in亦欲歡歡喜喜。4 恁著對上帝吟詩，唱歌謳佬伊的名；為著彼個坐車經過曠野者修造大路。伊的名是耶和華，著佇伊的面前快樂！5 上帝佇伊聖的所在做孤兒的父，做寡婦的伸冤者。6 上帝互孤單的人有家，互受關監的人出來享福；獨獨悖逆的人踣佇乾燥的地。7 上帝啊，早你行佇百姓的頭前，經過曠野。(細拉)8 彼時，地見著上帝的面就振動，天亦落雨；彼個西奈也振動，是見著上帝——以色列的上帝的面。9 上帝啊，你落大雨；你的產業以色列厭倦的時，你互伊堅固。10 你的會眾踣佇彼中間；上帝啊，你為著喪鄉人備辦恩惠。32 世上的列國啊，恁著對上帝唱歌；願恁吟詩謳佬主！33 就是謳佬彼個坐佇對古早就有極高的天的主！伊發出伊的聲，就是極大的聲。34 恁著將權能歸互上帝。伊的威嚴佇以色列的頂面；伊的權能是佇穹蒼。35 上帝啊，你對你聖的所在真正通驚；以色列的上帝是彼個將氣力權能賞賜伊的百姓的。上帝是應該謳佬的！

共同經課 - 3 彼得前書四章十二節~十四節，五章六節~十一節

12 所疼的兄弟啊，佇恁中間所有親像火的試煉，毋通奇怪伊(那親像抵著非常的事)；13 獨獨著因為有份佇基督的艱苦，來歡喜；互恁也佇伊榮光顯現的時，歡喜快樂。14 恁為著基督的名互人罵，有福氣；因為榮光的神就是上帝的神安息佇恁。6 所以，著家己謙卑，佇上帝大氣力的手下，互伊到時高升恁。7 恁用凡所掛慮的交付伊，因為伊關心佇恁。8 著節制，著警醒。恁的對敵就是魔鬼，親像哮的獅，四界行，啲尋所通吞食者。9 恁對信堅固著抵當伊，知恁眾兄弟佇世間也經過此樣的苦難。10 閣萬項恩典的上帝就是曾佇基督召恁，得著伊永遠的榮光的，佇恁暫時受苦的了後，家己欲互恁齊全、堅固、勇健。11 權能歸伊，到代代。阿們！

共同經課 - 4 約翰福音十七章一節~十一節

1 耶穌講諸個，就抬目向天，講：「父啊，時到啦，願你榮光你的子，通互子榮光你；2 親像你曾互子有權治理見有肉體的，欲互伊將永活賞賜見若你所互伊的人。3 此個永活，就是識你——獨一真的上帝，及你所差的耶穌基督。4 我已經榮光你佇地上，就是你所交代我行的工，我已經成伊。5 父啊，今著互我及你相及有榮光，就是未有世間以前，我及你相及有的榮光。6 「你所賞賜我出佇世間的人，我已經用你的名對in顯明。in本是你的，你用in賞賜我，in亦已經守你的道理。7 今in知，見若你所互我的，攏是對你來；8 因為你所互我的話，我已經互in，in承受伊，亦確實知，我對你出，閣信你差我。9 我為著in求，毋是為著世間求，就是為著你所互我的人，因為in是你的。10 見若我的，就是你的；你的就是我的，閣我佇in有得著榮光。11 今了後，我無佇世間，in佇世間；我歸佇你。聖的父啊，願你佇你的名就是你所互我的來保守in，互in做一個親像咱一樣。